



UNIVERSITÄTS-
BIBLIOTHEK
PADERBORN

Universitätsbibliothek Paderborn

Cornelii Iansenii Episcopi Iprensis Avgvstinvs

In quo hæreses & mores Pelagij contra naturæ humanæ sanitatem,
ægritudinem & medicinam ex S. Augustino recensentur ac refutantur

Jansenius, Cornelius

Lovanii, 1640

Censvra

urn:nbn:de:hbz:466:1-13650

CENSURA.

Quam in hoc suo AVGVSTINO Perillustri ac Reuerendissimo Dominus CORNELIVS IANSENYVS, Episcopus Iprensis tradit doctrina, videtur mihi esse non terrena, sed cœlestis; non tam sapientia humana verbis aut rationibus, quam diuinis auctoritatibus firmata; non Aristotelica, sed Apostolica; non de nouitate suspecta, sed ab antiquitate commendata: ab ipso Theologorum omnium Magistro S. Augustino, Spiritu Dei reuelante, pridem tradita & publicata; multorum Conciliorum sanctionibus definita, ab ipsa Sede Apostolica, totaque Ecclesia recepta & approbata: à multis sanctis Patribus prædicata & propugnata; septem sanctissimorum pariterque doctissimorum Urbis & Orbis Pontificum Ecclesiastico & infallibili iudicio confirmata; à præstantissimis Episcopis laudata, tanquam orthodoxa, cœlestis, Apostolica, Evangelica, delectatissima, saluberrima, & indubitata; tanquam à Magistro optimo, & summo in Ecclesia viro, quem nunquam aliqui sinistra opinionis rumor (vt loquitur Celestinus Papa) aspersit, profecta: ad quam etiam ipsi Pontifices dubios & in fide fluctuantes miserunt, ut ex ea discerent quid Romana, hoc est Catholica, sequatur & esse ueret Ecclesia inquit Hormisdæ: quam secundum prædecessorum suorum statum Romanam Ecclesiam sequi, & probare Ioannes II. profiteatur: quam qui impugnant & uana obicere, & recta impugnare, & priuam defendere, & diuina atque humanis constitutionibus rebellare asserit Prosper: cui cum adhereret, securum se exhibuit Bernardus. Et uere sicut in SS. Trinitatis mysterio nemo errabit sequendo Athanasium, sic nec in altissimis gratiæ mysterijs sequendo Augustinum: cui non solum Romanam & Africanam Ecclesiam, sed per omnes mundi partes uniuersas promissionis sitos, sicut in tota fide, ita in gratia confessione congruere, idem testatur Prosper. Et hic quidem Augustinus, tanquam alter Abraham, primus fodit puteos, è quibus purissima gratiæ Dei aqua, in salubrem pastorum oviumque potum educta sunt. Sed inuidi Palæstini, id est, Pelagiani (qui in Palæstina primò exorti, & damnati sunt) eosdem uarijs calumniarum & errorum faucibus iniectis opplere conati sunt; adeo ut & hostes, & aliqui etiam filij Ecclesiæ, non potuerint amplius haurire aquam puram, sed turbidam & lutulentam. Rem proinde necessariam & Ecclesiæ utilissimam mihi fecisse uidetur Eruditus hic Auctor, qui, tanquam alter Isaac, obstructos illos puteos ab ingestis ruderibus expurgauit, & iterum latitudinem, abundantiam, & aquam uivam inuenit; puram scilicet & delectatam Sancti Augustini doctrinam. Hanc autem & clarissimè & fidelissimè representauit, omniaque de singula, quæ sanctissimus Doctor in uarijs libris de statu naturæ integræ, lapsæ, nudæ, reparatæ; de peccato originali, eiusque effectibus; de naturæ, efficacia, & necessitate gratiæ Saluatoris nostri Dei, aliisque altissimis fidei nostre mysterijs docuit, & pro occasione alibi latenter, alibi patenter sparsit, magno studio & indefesso 22. annorum labore, insigni ordine & methodo in hos tres Tomos redegit, tantoque argumentorum & diuinarum rationum densitate stipatam exhibuit, ut quemuis Lectorem, ueritatis amicum, passionibus non præuentum pondere ipso quasi opprimere, & dulci quadam uolentia in suam sententiam trahere uideatur, itaque cum hic non exhibeatur doctrina aliqua noua, ex humano cerebro, aut placitis Philosophorum (quos merito Tertullianus Patriarchas hæreticorum uocat) conficta, sed à Principe Theologorum omnium Sancto Augustino pridem tradita, & à sancta Catholica Romana Ecclesia (quæ columna est ueritatis) approbata; existimo non solum expedire ut ea atramento uoluminibus chartaceis exprimatur, sed tabulis quoque cordis carnalibus imprimatur, totoque orbe Christiano publicetur. Verum sicut Auctor totam suam doctrinam, ita & ego hanc censuram sanctæ Sedis Apostolicæ iudicio humillimè submitto. Hac S. Thomæ Aquinatis, Anni 1638.

HENRICVS CALENS S. Theol. Licent. Metropolitana Ecclesia
Mechliniensis Canonicus, Archiepisc. Bruxell. Librorum Censor.

CENSURA

Hoc opere, per Reuerendissimum D. CORNELIVM IANSENYM Episcopum Iprensis, de hæresi Pelagiana, de statu naturæ innocentis, lapsæ, puræ, reparatæ, singulari miraque eruditione concinnatò, arcanissima diuinæ providentiæ circa creaturam rationalem dispositio panditur, liberi que arbitrij natura & gratiæ uires explicantur, ubique conformiter ad Diuini Augustini doctrinam: cuius principijs Auctor sic inhaeret, ut non tam solum quam ipsius Augustini sensum exprimat & explanet. Quamobrem opus hoc prælo ac publicæ luce dignissimum censeo, fructulque eximios solidarum uirtutum Orbi Christiano allaturum confido. Datum Lovanij 13. Kal. Iulij M. DC. XXXX.

IACOBVS PONTANVS S. Th. Doctor, Pontificus ac Regius
Librorum Censor.